



耳溪集一

詩歌賦辭總目
謠

16
2330
1

共二十二



和
門
號 2330
卷 /-2/

癸卯新編

耳溪集

四文堂藏

耳溪詩集序



鄭樵有言瞿曇之書能至諸夏而宣尼之書不能至
跋提河聲音之道有障礙耳此似是而不盡然也夫
地員九萬里國土至多自其異者言之豈但聲音障
礙卽文字亦障礙自其同者言之則殊方絕域有不
同之文字而無不同之性情亦無不同之義理故凡
宣暢性情辨別義理者雖宛轉重譯而意皆可明見
于經者春秋傳載戎子駒支自云言語不通而能賦
青蠅是中夏之文章可通於外國見於史者東觀漢
記載白狼王慕德諸歌具註譯語是外國之文章亦

耳溪集
可通於中夏况乎文字本同者其所著作又何中外之殊哉特工拙得失視其人之自爲耳唐武平一景龍文館記載中宗正月五日蓬萊宮聯句有吐蕃舍人明悉獵今金川以及廓爾喀其故地也竟無能繼者宋計敏夫唐詩紀事載南詔國王驃信與其清平官等唱和今緬甸其故地也亦無能繼者其同文之國納贄獻琛得簪筆彤墀賡颺天藻者惟朝鮮琉球安南而篇什華贍上邀睿賞惟朝鮮爲多其詩文集傳入中原者亦朝鮮爲最夥余兩掌春官職典屬國所見不能搜數也乾隆甲寅冬判中樞府事洪君漢

師以職貢來京師器宇深重知爲君子旣而知其先以壬寅奉使與德定圃尙書博晰齋洗馬戴蓮士修撰遞相唱和與之語聲音障礙如鄭樵之所云索其詩因出所著耳溪集求余爲序近體有中唐遺響五言吐詞天拔秀削絕人可位置馬戴劉長卿間七言亮節微情與江東丁卯二集亦相伯仲七言古體縱橫似東坡而平易近人足資勸戒又多如白傅大抵和平溫厚無才人妍媚之態又民生國計念念不忘亦無名士放誕風流之氣觀其耳溪文集中有與人論詩數篇往往能洞見根柢深究流別宜其醞釀深

厚葩采自流所謂詩人之詩異乎詞人之詩矣余天性孤峭雅不喜文社詩壇互相標榜第念文章之患莫大乎門戶元遺山詩曰鄴下曹劉氣儘豪江東諸謝韻尤高若從華實評詩品未便吳儂得錦袍此以疆域爭門戶也劉後村詩曰書如逐客猶遭黜詞取橫汾亦恐非箏笛安能諧雅樂綺羅原未識深衣此以學術爭門戶也朋黨之見君子病焉朝鮮距京畿最近內屬竄早奉職貢最虔沐浴醲化亦最久聖朝六合一家已視猶閩閩貢使文章又有志於古作者如區分畛域置之不道是所見與門戶等豈王道蕩

蕩無偏無黨之意哉因爲書數行弁於簡首俾四瀛以外知詩也者發乎情止乎禮義此心此理含識皆同非聲音文字之殊所能障礙共相傳習一如朝鮮之儒雅文德之敷其益恢益遠矣乎

光祿大夫經筵講官禮部尙書兼文淵閣直閣事河間紀勻序

耳溪文集序

飴山老人談龍錄引吳修齡之言曰意喻之米文則
炊而爲飯詩則釀而爲酒飯不變米形酒則變盡其
意謂文易而詩難也余則謂詩文各有體裁亦各有
難易杜子美之詩才而散文多詰屈皇甫湜李翱之
文筆而詩皆拙鈍才有偏長殆不可強古來詩文皆
長者屈指典籍代不數人其餘巨製鴻篇汗牛充棟
大抵文附詩傳詩附文傳備一家之著作而已余旣
爲朝鮮洪君序詩集復得其文集讀之不以贗古摹
秦漢如嘉隆七子所爲亦不以機調摹八家如鹿門

之末派方圓自造惟意所如其寄託恢奇上薄元結
孫樵劉蛻其清辯滔滔出入於眉山父子卽一二小
品亦擺落公安竟陵之窠臼嶽崎磊落別調獨彈其
心思如水瀉地縱橫曼衍其氣機如雲出岫宕漾自
如皆洋洋纒纒初無定範意盡言止而文成法立焉
其諸天機之所到乎然非縱心一往不醇而遽肆者
也夫善御馬者銜勒在握則注坡驀澗而不蹶善操
舟者針舵不失則衝風破浪而無損善用兵者客主
之形奇正之用罔不先機坐照則節制百萬之師而
不亂先操其本故也洪君之文雖暢所欲言而大旨

則主於明道其言道也不游談鮮實索之於先天無
極不創論駭俗求之於索隱行恠而惟探本於六經
蓋經者常也萬世不易之常道也道者理也事之制
也理明則天下之是非不淆百爲之進退有率千變
萬化不離其宗以應世則操縱咸宜以立言則了了
於心者自了了於口投之所向無不如志然則洪君
之文其又勝於詩矣乎洪君之詩其亦根柢於文矣
乎杜陵有言文章千古事得失寸心知洪君見此其
亦相視而笑否耶河間紀句又題

卷五

詩

卷六

詩

卷七

詩

卷八

詩

卷九

詩

卷十

序

卷十一

序

卷十二

記

卷十三

記

卷十四

記

卷十五

書

卷十六

題跋

卷十七

銘

頌

贊

辨

論

解

卷十八

傳

自序

雜著

卷十九

疏劄

卷二十

疏劄

卷二十一

疏劄

啓

議

卷二十二

教命文

頒教文

箋

致詞

教書

上樑文

卷二十三

進香文

祭文

卷二十四

祭文

哀辭

卷二十五

碑

卷二十六

神道碑

卷二十七

墓碣銘

卷二十八

墓碣銘

卷二十九

墓碣銘

卷三十

墓碣銘

卷三十一

墓碣銘

卷三十二

墓誌銘

卷三十三

墓誌銘

卷三十四

墓誌銘

卷三十五

墓表

卷三十六

諡狀

卷三十七

諡狀

卷三十八

諡狀

耳溪集卷一目

辭

放鴈辭

詛虎辭

烏曷巖辭

祈晴辭

再祈辭

賦

藉田賦

薊門烟樹賦

太阿如秋水賦

Blank writing area with vertical lines.

耳溪集卷一

辭

放鴈辭 并序

季秋之月孔慶興一號孔州之野人生得二鴈剪其翮以獻
 余歸其直而畜于庭饗人曰是味旨於雉請膳之余
 曰毋是鳥也羣而有序其有禮乎侶而不亂其有義
 乎飛必隨陽是其智也至必如期是其信也嘴不啄
 生爪不攫物近於仁矣羽蟲之微具此五德故其居
 載於書其聲詠於詩月令紀其來賓嘉見執以成禮
 凡以尚其德而昭其靈也如之何其羹之炙之雉鶉



鷄鴨然乃日餼以粟盆水濟其渴茅薦禦其寒夜則密其藩扃其實以遠狸鼠旣月翮始長可舉於是升高而放之送之以辭曰

爾之飛兮無北白礫林兮氈毳落黑水吼怒兮曾冰攢角朱鬣綠睛兮熊攫豹食大弓長鏃兮捷投遠弋爾北徂兮爲彼得爾之飛兮無南赭墳瀉沕兮沸水淫淫蝮蛇騰空兮尾豎舌銛火山爍日兮揚芒鼓炎爾南翔兮毛將燭爾無東渡幼海兮洪濤滂汨而瀟泮巨鯨吞帆兮奔鱗躍噬烏齒鏤身兮心巧手銳毒丸伺物兮霆擊焱駭爾不避兮骨筋碎爾無西過鴨

水兮赤縣蒙穢而幽昧左言短衣兮腰槩臂矢逐肉充饑兮腥臭是嗜搖翟插幢兮毛羽之不棄爾適彼兮爲羈鬼於樂青丘日初暘兮箕張角垂經緯光兮山嶸水縹適燠涼兮膏壤千里足稻粱兮有 聖涵育澤溥長兮不麀不卵物殷昌兮爾莫他方之逝返舊鄉兮携妃兮喚族嬉雲兮叫月啣蘆兮避矰色舉兮遠羣春去兮秋來終汝天兮愉佚亂曰奮長翮兮挾浮雲超鬼門兮上磨天狴朔野兮跨鐵關度金城兮集華巔遊漢都之赫戲兮舞德輝以翩躞朝刷翼於上林兮夕弄影於天津揚清音之嚶唳兮近玉樓

之螭蝟爲報孤臣兮滯塞垣髮盡白兮心彌丹

詛虎辭

慶興海邊有惡虎縱橫一月斃人或至三四爲邑大患而邊地有砲禁無以捕

余乃作此辭刻木立之虎患自此頗息

耿耿素威山之君猗隆額卷尾負玄文猗雙瞳電爍
百獸奔猗風嘯霧變長毛羣猗少皞胚精辰象寅猗
巖踞藪伏遠人隣猗胡畔厥次遨海濱猗有邁無釋
血牙齧猗蹄鬣之不足及齊民猗穉骸者肉恣嚙吞
猗寡哭孺呱聲沸喧猗晝不單行夜晷門猗狂視矍
矍號蒼旻猗哀鳴唧唧鬼叫冤猗皇天之播衆萬物
物人人猗各廬其宅區域分猗林則羽而水則鱗罔

敢糅紛猗昔有虞命伯益山澤焚猗粵姬公驅猛獸
素翟賓猗 聖人出乎震如日月新猗革頑剗宄流
氤氳猗鷲鳥之化鳩感陽春猗凡民患害靡遠不詢
猗鬼門瑟海視庭闈猗含氣麗土之族悉王臣猗矧
爾物之靈曷不戢以馴猗山君兮歸去人間不可以
久蹲猗前有土門之江其外女真猗天開大荒草木
綦綦猗白山千里壓厚坤猗黑水漫漫珠出蠙猗德
林之石皚如雲屯猗封豕玄巖富麋麋猗擇肉爲糧
積廩困猗妖狐九尾盛姬嬪猗爾宴爾室育兒孫猗
山君兮歸去行不可以逡巡猗王靈於赫誅不循猗

耳溪集 卷一
長戟如林劔嶙峋猗烈砲如雷糜骨筋猗燔巢剔窟
無處寄身猗機置四張飛不得騫猗攀木悲嗥如窮
猿猗束身就死若孤豚猗爾勇何施爾智何存猗始
搖尾而乞命夫誰假汝之恩猗斷顱爲枕皮作茵猗
磨骨絡纓鬚插巾猗佞鬼羣跳嗔爾魂猗爾性雖猛
有鞠子之仁猗爾雖嗜殺愛其生則均猗吾今與汝
約三日五日至子旬猗挈族兮引黨行矣𦉑𦉑猗鳥
舉焱疾渡彼北津猗毋爾衰耳聽我誓言猗山君兮
莫淹留人不可殺天孔神猗重爲告曰春風兮祁祁
陰山青兮草菲菲黃雲漭兮四蓋長楸濶兮獵夫稀

鳥獸兮毛澤牛羊滿野兮鹿豕肥百靈續其並迓風
爲翼兮霓爲旂偃蹇騰蹕兮壽且樂山之君兮胡不
歸

烏曷巖辭

巖在西水羅東海口十里石峰屹立水中與
海望臺相對爲左右龍虎其外豆滿江入瑟
海

北登烏曷兮俯臨溟渤積水瀕洞兮大氣坱圠水天
相盪兮坤輿東缺白頭巉巖兮斗柄之揭

烏曷之角兮東有出日玄陰始闢兮大塊中豁雲龍

翔拏兮光氣翕歛萬象一影兮莫逃纖末
百瀆同湊尺流不溢十日並沃勺水不竭巨鰲何時
尾閭何洩安得窮源長風一筏

祈晴辭

維孔爲州薄江海些極北盛沍春不解些風厲霜夙
穀易敗些往歲在丙丁極備些民阡于壑未蘇憊些
今春亢陽稼失藝些及夏乃雪仍成霈些旣播旣茁
惟豐後些胡雨之恒終月季些厥或乍暘又蒙瞶些
稷未吐穗麥不米些有毒其豸羣咬噬些民無見粒
食稊稗些土之無毛神不餒些民之旣疹神誰賴些

旋機奮權揮靈旆些呵叱玄冥招屏翳些一掃陰霾
廓清霽些風褰日舒捲曖霽些螟螣旣去禾麥茂些
萬姓含賜樂有歲些神功溥長歌永世些牲博黍馨
樽有醴些齋躬乞靈首屢稽些神兮降顧庶無悔些
民生民死惠不惠些

再祈辭

積雨兮病稼民遑遑兮靡訢躬走兮山川靈剌剌兮
俯顧方選牲兮戒衆尙陰霏兮含吐及薦葷兮展辭
俛星月兮森露承靈貺兮不遲紛巷歌兮野舞風撓
兮日曬藹木麥兮嫗乳三之晝兮始匝胡旣霧兮又

以雨輟耒兮罷銍芽者屈兮苞者腐嗟爲德兮不竟
衆戴日兮瞿瞿諒菲誠兮未感哀我民兮何哺省躬
兮潔儀簡良日兮申籲白山兮北峙豆江兮東注靈
之德兮養物靈之職兮司土噓喻兮奮揚左秉彗兮
右植羽滌重陰兮晡翳布新曦兮溫煦望四野兮疑
疑咸蘇悴兮起仆來牟兮旣碩黍稌兮不斃含生兮
乃粒何神功兮廣普清酒兮旣灌籩有菜兮豆有脯
靈連蜷兮少留庇我民兮終古

賦

藉田賦

上之十五年己未孟春親耕于東藉臣時年
十六獲瞻盛儀謹述此賦

協洽之歲月旅大族甲乙統日吉日維亥 王帥卿
士爰征蒼牧易彼王藉于時民茲胥樂載謳載謠咸
曰展矣皇哉於戲我 后洵盛典也客有博古而好
問者惠然而來率爾而詢乎余曰蓋聞勞力者食人
勞心者食於人是以君垂拱於上而庶辟呈其職百
工供其力或垂裳而無爲或南面而恭已尊莫高於
萬乘卑莫汙於農圃且以匹夫之身不可備百工之
事而况於萬乘之主乎有田峻焉有農正焉奚必躬

執然後爲農耕且爲國君子不屑鄒叟固刺其齷齪
論爽德而爲美談罔規譏而反頌服豈其未達而然
歟抑非凡識之攸覈者歟蒙竊惑焉惟子攄舊發幽
以剖寡識余憮然有間廼盱衡而慙曰善哉子之問
也美則美矣然所謂末學膚受曉一而未析其二者
也吾雖魯塞槩爲子敷之夫民者萬物之元而非農
無以生農者天下之本而非民無以成農須民成民
須農生肆在生民之初巢奠陶宅茹實餐血旣鑽廼
燧肇火厥食神農儼其啓極百穀紛其栽植理汗濕
以闢洫拓臯京以南東田野歛其易耨黍稷碩以穰

穰爰秋穫以夏耰臚黎用夫底寧是以先王制禮立
極曰教暨養教之維何致孝爲先養之維何務本爲
先所謂致孝者禋誠敬於祖禰奉烝嘗與禴祠所謂
務本者勤遊豫以懋農翼厥黎於富庶式身先之民
廼率服躬稼以供齋明親繭以給冕黻義文逃而道
泯竟禮樂之騫缺恒未遑而誼貢靖鮮終而號拾紛
背本而循末僭莫懲而相襲克憲古者幾希彌年所
於千百惟我 后挺天縱之懿相續先烈以樹極繩
玄靈以軼武藐百王以峻德亦三思以顧譽勗自強
而不息躬追養於宗祧感烝烝於時物思先勞以勤

已緝舊章而敬止于時斗建青陽之躔日離營室之
次蒸陽鼓發潛戶動股農祥晨正土膏脉起益之以
霽霖孔優且渥隰沃衍腴灌饒溝足乃命司畿澄隴
野廬肅塗汰其沙礫樵其蕭茅我田膺膺如砥如矢
層壇屹其岳立翠幕蕤以翼舒太史觀禎鑽龜端著
辰良撰止乙亥孔嘉禮官整儀乘輿聿駕鸞輅儼以
啓途六龍驤以沛艾颺辰旒之淖淖曳青蜩之離離
千官景從萬騎紛紜鑿鉦噦噦以欽欽鼗鼓嘈嘯以
訇隱皞氏秉翟豐隆滌塵百神森其備護睠蒼垌以
天旋紛紛翼翼以低回適皇沛若疾霆隱雷而激迅

風也迺屆靈壇靈壇孔陽絜爾牛羊整爾祇誠揚燠
燎之炎煬致高烟於日社神歆馨而顧德膺元吉以
百祉於是載卽于野天田孔臧伯益奠牛詢正具駢
衣維黝服絡維縹鞵藍紉靛未紺轅黛衡我耜旣覃
百儀旣同旣堅旣好旣備旣戒 王廼冠通天綦玉
笄御袞衣紆皇組火龍黼黻藻綵肇厲執玄圭之肅
肅珮葱珩之將將司儀辨等尊卑以張百僚有踐星
陳天行蟬冕金貂肅肅端璋如鱗斯萃如鴻斯翔渙
乎若百源之宗于海燦乎若夜光之剖諸蚌也伯夷
相容率由舊章禮秩義舉威儀孔明翼翼師師穆穆

皇皇踏踏莫莫濟濟踴踴信天下之壯觀曠世之宏
趾也聿降于野式撫御耦常伯秉策太僕執轡載五
其推爰告爰止烝爾公卿或七或九司農挈筐以藝
種祈父荷耒以耔土 王反于壇庶民終畝播厥百
穀王耜旣臧厥禮載集春日未央爾乃大饗于法宮
旒纒儼於宸極百辟森以辰拱膳夫割牲籩豆有楚
旨酒嘉穀賜胙行魚舉疇逸逸飲酒孔偕莫怨具慶
旣醉旣飽砰廣樂之九奏展洩洩以喈喈鍾鼓喤喤
簫管嘒嘒 天顏酡斯有愉其容臣具衍止其樂融
融不失其儀萬舞幡幡赫如渥赭各奏爾能 王曰

念哉樂不可盤羣臣宣警獻納平平各淑其身胥勗
諸人酌以景福眉壽萬年小大歡康苾苾薰薰饗餼
浹乎家陪惠賜潤乎輿卒莫不歌舞乎大同沐浴乎
膏澤信古今之盛舉君臣之至樂也斯時也道靡遐
邇地暨都鄙漁倪樵倩田夫野耄舉欣欣然有喜色
而相告曰吾 王庶幾無疾病歟何以能闡斯舉也
其博聞強識宏達大雅舉彈指延頸有怡其色而喟
然歎曰於戲不圖今日復覩三代之盛美矣韜棲巖
穴之士咸背僞而歸真工商雜藝之倫盡去末而反
本惰農聞之曰 王亦食力於是乎勤饗夫聞之曰

王亦重食於是乎蠲爾乃鷩冠韋帶銜黃戴白荷杖拂裳彈蓑振褐左提右挈前進後續或齎糧而跋涉或連騎而絡繹咸相顧而鞠曰盍往觀旃聖政赫矣行人彭彭車馬塤塤如市斯歸其麗不億散漫雜沓而萃蔚若魚頰而鳥頡盈野敷路填墉溢郭或攀山而頰眊或緣崖而側目駢肩脇踵連袂累祛黃塵暄陽流汗成雨杳杳林林繩繩煚煚如碁布寘如石匣陳如織如灌如麻如雲鬱乎若脩林之麗山卒緝乎若茂草之苞衍隰也靡不發矇披聾動容拭目手抃足蹈口頌心悅胥曰猗歟我 后侯其偉而或有長

老皤叟拜手稽首獻壽將美因奏而稱曰天生烝物以倫爲經人有百行以孝爲元百工之林農其本萬事之族食乃天上以風動下其尚也偃高以綱維卑其張也騫於戲我 后昧爽丕顯匪遑底寧安不忘危處泰怵傾戰臨濟以漏航凜朽索之馭奔遵繩墨以不頗厲惕若而乾乾懼追遠之不及睠稼穡之艱難惟穀是恤利民斯行展三時之弘務緝烈緒而有光敬事忘勞所以示勗也躬親耒耜所以示約也班推而舍所以示節也自公及私所以示秩也薦黍稷以供齊明所以敬鬼神而孝皇祖也勸稼穡以給資

耳溪集 卷一
具所以虞國用而足百姓也欽誠殫於宗公教養隆於烝億盛矣躋乎孝於斯極農維曰力維勗維約維秩維節儀刑孔孚萬邦爲式是以禱之郊社則神祇格而降之吉饗之禘嘗則皇祖醉而錫之極羣黎樂胥徧爲爾德屢効豐年之休默亮無疆之福暘雨維時如幾如式疆有滯秉民無菜色國陳仍年之樞士物代耕之祿家贏養育之產鄉優卹救之畜民咸收溥反淳戕巧抱慙捐金於淵抵璧於谷賤犀象而不珍擲璠璣而不簇厥寶斯何惟善與穀仁風綏而外衍義聲抗於無域雍熙洽乎上下贊天地之化育皞

皞蕩蕩徽猷四塞不知其遷順帝之則是以淵鞠夏沼之鱗碱藝帝庭之葉頤東園之仁趾儀丹穴之玄翼登皞黃而埒隆狹三王爲隸齷稽之二典則猶可駢廓齊式方之雅頌則不翅易歲改日匪所好余敢阿寔未毫釐於什佰此其德之流而效之稷也卽炎神之膚公棄劉之餘烈實敷教之大經爲邦之要業也烏得謂齷齪烏得謂爽德子大夫休矣徒爾屑屑吾將授子以詩遂頌以賡之其辭曰倬彼甫田有沃其疆式遵舊趾日吉辰良 王赫斯臨萬品率從王推而跋百美攸鍾恤隱除青庶民匹休濟濟髦士

亦孔之膚式煢莫愆神祇攸扶受天之祐厥禡孔膺
鼓以風雷潤之雨露疆域翼翼禾易長畝我黍或或
我稷蕤蕤穫我公田爰及我私于以齊明以饗以祀
薦之烈祖烈祖顧止神嗜飲食永錫純嘏曾孫保定
壽考萬週民樂其利受賜孔阜千斯其倉萬斯其箱
於昭峻德不顯其光遐不黃耆永綏無疆言未罄客
瞿然自喪竦然起敬斂手再拜曰鄙夫以莽滅之識
知粗而不究其精今聞君子之言渙然冰釋如披重
霧而覩白日也助華大哉之君三代可封之俗何以
尚茲走雖不敏請終身而誦服焉

薊門烟樹賦

三韓使者涉遼野穿長城吊燕丹於衍水訪飛將於
北平朝發玉田將向薊丘于時陽曦始舒曉靄初收
天蒼蒼而四垂野茫茫而無垠轉眄東南澄湖際天
瑩如明鏡滑如爛銀車流馬逝不見行塵樹木村閭
浮在水面或如帆檣之出沒或如島嶼之隱見或如
蟠竦之飲河或如鯨鯢之吹浪明滅變化光恠百狀
余問驛夫曰彼何水耶若是浩渺而不見涯涘也驛
夫對曰此非水也所謂薊門烟樹者也余瞠然異之
停車捲幔徐察其形有影無波有色無聲平鋪地上

上混天光近睨則漸消遠睇則如故始若在前倏爾在後自彼視我則我亦化於烟樹乎愴然疑久不能去從者問曰此何氣也余乃默然沉思若有神解夫天地之間有光有氣山川出雲江海作霧是所謂游氣也陽輝成霓蜃噓成市是所謂光恠也今是物也隨風而變質借日而成色就之而不見攬之而無迹凝兮其似烟淡兮其似水寄象於有無之間混形於空明之裏天與野而相薄自生景於兩際盖山川之餘精造物之能事也從者曰誠如子言幻也非真何造化之多端設如是之觀也余曰天生萬物夫孰

非幻榮枯聚散終歸於盡故朝霞夕嵐一時之幻也春華夏蟲一年之幻也富貴權勢一世之幻也盍試觀夫燕薊之間乎北望無終之山盖有昭王之塚焉方其遷齊器於寧臺植汶篁於薊丘功業如彼其盛也東眺山海之關卽秦皇鞭石之墟夫旣內吞六國外拓四夷斬山爲城據海爲池聲威規畫又何壯也會不數世皆已烟銷而燼滅過者爲之徘徊而惆悵是亦豈非幻耶曰然則世所稱豪華得意皆不盈於一視君子所恃者何事余笑而答曰君子之道厥有其常修於身而爲德行發之言而爲文章利澤及于

生民聲名昭于簡冊不倚形而立不隨物而滅當與
日星而并耀何足與彼較短長與虛實哉

太阿如秋水賦

癸丑八月設七夕製以太阿如秋水賦命題
臣良浩以藝文提學參考券先命禁直諸臣
以此題應製臣等入侍考券定等第復命弘
文提學閔鍾顯前提學李秉鼎暨臣又製進
上親考置賤臣作二下魁賞賜大鹿皮

神器握以化權招白帝使揚靈揮乾剛而赫威拂坎
精而騰光明堂巍而坐按老龍吟於秋濤憑神武於

大柄視寶鏑於寒波皇王有此利器三尺威於天下
裁陽縵而範質鼓化鑪而成鈇茨山鑿而發劔肇錫
名曰太阿神物自有所歸后以之而馭世燕爲鐔而
岱鍔德以膏而義制鎔何待於百鍊運無方於一試
光剡剡而外鑠疇可與乎比擬秋之水兮幽幽稟天
一之玄精無纖滓於澄澈涵灑氣於空明顧而視乎
匣中混一色於長天承日華而激灑瀉露紋而淪漣
目自眩於澄光耳若聞於寒聲乘金天之義氣並麗
水之粹英初凌亂而截波倏峭峯而衝星山河定於
指麾天地爲之低昂三軍忽其頭白四海廓而氛晴

續奸宄之自伏孰強圉之敢撓中天高而一刃仰秋色之崢嶸水與劔而同體人得器而成功銅山斂其秀氣西序傳以重寶肆一人之摠萬貴大權之獨御神機默而自運操與縱其在手然張弛之隨時貴威德之並施兵惟用於禁暴武蓋取於止戈秋雖主於肅殺水則利於生養伊古人之取象示不得已乃用

耳溪集卷二目

歌謠

青丘短曲

北塞雜謠

耳溪集卷二

歌謠

青丘短曲

日之曙

兒兮日之曙荷耒南畝去
麥畦當先薅秫田次可除
歸時採桑城南持與少婦飼蠶

山上去

腰鎌山上去背薪雪中歸
老妻滌釜待炊穉子候門
呼饑翻嫌燧人氏教人火食真多事
不如餐木飲水時人生百憂從此始

莫燃松

莫燃松明月上前峰
莫設席紅葉滿溪石
兒兮急速取酒來
山肴野蔌聊以娛今夕

秋夜永

洞房秋夜永厭聞蟋蟀聲
何事雲間鴻又向月中鳴
渠自無心聽自愁夜夜孤枕夢不成

一日

一日如三秋一月當幾秋
徒知眼前樂不念閨中愁
爾雖不我思我思那能休

川有鱗

川有鱗兮桃花肥
甕有酒兮竹葉香
明月在山短琴橫
床此時故人來不來
松影依依過東墻

青箬笠

青箬笠碧蓑衣
細雨飛時荷耜歸
山田草多除未了
倦臥綠陰裏何來一聲牧笛驚
破夕陽閒睡

手把竿

手把釣竿獨去前溪水
漲魚肥騎牛客來如相問
言我帶月方始歸

橋邊衲

橋邊白衲影過問爾何山歸去
悠然飛錫不語笑指

白雲生處

睡起

睡起忘釣竿舞罷失蓑衣嗟爾小兒曹莫笑老夫狂
且癡春江十里桃花發少日豪興未全衰

溪上釣

溪上釣魚貫柳條爲賒春酒度斷橋千村渾是杏花
不知何處酒家

裹飯

裹飯青荷葉掛壺綠柳枝扁舟隨波任所之不知行
遠近但見前山移

古人

古人不待今人今人還思古人古人雖已遠行處又
今人莫道今人古人不相及聖賢與我均是人

一臥

一臥山中後石逕埋蒼苔無人更相訪柴扉不須開

山之雲

山之雲何事出山去去作人間千里雨待得慰滿三
農歸與閒人共住

百年

人生縱使百年百年真如風中烟除却疾病與憂患

開口笑語能幾時况復百年難期今我不樂何爲

人生

人生不滿百此身寧有二元是假形來偶然寄在此
胡爲漫營營所貴惟適意

汀洲草

汀洲草色遠依依輕棹載酒下烟磯滿江蘆荻白鷺
飛春水如酥魚正肥悠然獨酌對斜暉江風拂面酒
力微山頭日落行人稀欵乃聲中垂綸歸不知夜何
其明月滿人衣

萬壘山

我住萬壘青山裏君遊十丈紅塵中紅塵翠蓋映朝
日細柳白馬嘶春風願君善事明主和陰陽風雨知
時年穀豐使我瓦罇秫酒長不空

關東

關東風景問何如山僧向我說依稀鳴沙十里棠花
外夕陽疎雨鷺雙飛

落葉

馬蹄行踏落葉步步皆生秋聲西風捲向山頭去秋
聲却從雲間生

青山裏

青山裏碧溪水誰令日夜奔流一到滄海無歸日明月滿山何不少淹留

溪邊鷺

溪邊彼白鷺久立欲何爲魚自無心莫相窺同是水
中活不如兩忘機

烏不黑

誰謂烏不黑誰謂鷗不白黑白不可易有目皆可識
如何世人惡分析欲將黑白混一色

園中竹

青青園中竹雪壓枝半披莫以枝暫披遂謂節可移

苟非歲寒不改操安得雪中青如斯

萬頃波

萬頃滄波之水鷓鴣鷓鴣鷗鷺鴨共浮沉問爾浮
沉在水面能知水淺深嗟乎水雖深猶可測孰知世
路與人心

北塞雜謠

城津

城津夜已深渤海風又起寒燈明滅不成眠故鄉回
首三千里置之勿復思磨雲磨天都已過思之亦奈
何

鬼門

鬼門斜日千里飛雪短髮飄零寒風蕭瑟行人到此
墮淚馬蹄爲之流血惟君眉睫如常日憑軾高哦猶
不輟

白頭山

白頭山在北斗邊行行終須到上巔今人不肯去攀
但道山高如天

叱牛

叱牛上山去山高逕仄牛喘息把犁將墾土土硬人
汗犁不入牛兮努力莫退恟爾喘我汗亦奈何今也

不畊時不及

北地

北地宜好麻家家爲締絡收子榨成油束莖燃作燭
油以調菜羹燭以照紡績看汝足下屨亦是麻皮織

藝麻

三月藝麻七月穫五日縑絲十日濯纖手弄杼作細
布薄如蟬翼小盈握可惜盡與南商充官債身着麤
裙不掩脚

豆江

豆江四月冰雪消松魚始自瑟海至江邊家家結大

網持網赤身入江水嗟爾逐魚慎勿過半江半江之外非吾地

松魚

松魚無乃松江來巨口細鱗兼四鰓大者如箕小盈尺一網剩得盤上堆其味孔嘉莫先嘗予以獻之公堂

鹿茸

北方五月夏至後鹿角始解方出茸嗟爾火炮手來月進上當封火急持砲上山去深入莫怕豺虎逢得來帶肉淺毛竹笋樣不然不合御供

海棠花

豆滿江邊海棠花五月六月初結實城中兒女十成羣褰裳帶筐一時出大者如杏酸如梅肉少子多不堪啜問爾摘此何太勤此地無果代棗栗

金山

金山草綠豆江烟生隴頭遠近勸歌牛背短長笛聲嗟爾邊城士女同我百年太平

去月雨

去月雨今月雨一雨何太苦兩麥浸水半登場粟始發穗兮稷未吐嗚呼南土好雨北土好旱天公何以

均好惡

孔州田

孔州田豆江邊年年江水齧我岸昔日良田今行船
爲語江神何不公不獨奪我民口食一寸土是三韓
寶大國日增小國日蹙

借車

東家借車矣西隣有牛否聞說來日開倉載糶入去
官府嗟我里人來莫遲今日納倉明春復受

兒旣生

兒旣生矣當洗盆中貯來清水水雖冷兮兒莫啼百

病消除堅骨理北方苦寒又多風耐寒耐風從今試

北人

北人無長物頭上多好髮問爾何因爾答云無他術
但將米泔頻頻沐時把木篋細細櫛長者與身齊磨
來快刀截聞說南方好高髻一握可換布百尺

赤狗皮

赤狗皮身掛生牛革足穿皮衣冬夏皆宜革襪水陸
俱便南人莫笑我朴陋錦衣珠履無百年

木弓

木弓兮蘆矢江邊兮習射狹袖兮氈笠長楸兮走馬

嗟我邊城兒努力莫少惰若得選入親騎衛萬戶權管無不可

江邊鴈

江邊弋一鴈剝皮將魚食肉間帶一丸堅黑小如粟此物豈是人間有問之故老能辨識東海云有小人國鴈到其國與人鬪往往不勝遭彈射中之既不死多於鴈身得

北俗

北俗好鬼神男巫謂之師師者衆所尊爾名焉取斯瞽師教卜筮禪師教念佛惟底人誰學爾術播間酒

食僅一飽細布繇絲從何出

北關男巫例貢細布綿絲故云

海賈

海賈恟風波賣船因買馬驅馬上峻坂羊腸詰屈不可下已矣乎水陸皆險難行不如歸去耕稼

跋高車

跋高車無輪亦可以行地者皮船無帆亦可以泛水惟昔軒轅始造時採木剝木應如是莫羨九馬之車萬斛舟軸折檣摧恒在彼

幽蘭

幽蘭在空谷白雲在高山蘭有香兮可掇雲有影兮

耳溪集 卷二
可攀彼美一人獨不見欲往從之道路艱

天馬

天馬出漠北一日再躡燕山道伯樂已遠無人顧鳴
不盡意食不飽食不飽兮行無力駑駘在前兮蹇驢
笑

疾雷

疾雷破山聾者不聞白日中天瞽者不見道德文章
之美愚者不信王霸義利之分衆人不辨嗟爾世間
男兒莫言有耳有目聰明不在耳目惟係一片靈覺

惡木

惡木不可蔭貪泉不可飲羊腸不可過虎鬚不可攬

黃鵠

黃鵠翔雲霄一舉橫千里鷦鷯游叢薄跳踰尋丈裏
均是羽蟲族高下不齊何若是嗟乎人性賢愚間奚
直二鳥帝

海東青

海東青飛滄溟一舉白頭巔再舉烏喇城金眸玉爪
橫秋空千里雉兔無全形安得猛將如爾大獵漠南
王庭傾東海洗臙腥

青山

青山爲屏風白雲作藩籬白雲有卷舒青山無轉移
雲山本異性何事長相隨我亦無心者還與雲山期

赤池

赤池多鮒魚赤鳥產紫芝陸民與海民漁採資生涯
於乎先王遺德至今每飯必思

水中島

青青水中島白沙上鳥春來遺卵大如毬剖之作
杯好盛酒願斟滄海千頃波遙獻金宮萬年壽

西水羅

西水羅海望臺烽火初起處嗟爾烽臺卒每日午時

宜燃炬此去王京三千里日暮始過鐵嶺去

撫夷堡

撫夷堡西將臺遙望穆祖舊墅黑角峰奚關城野
嫗奉碗何處至今明珠遊山上何事蓮花過江去

會寧市

會寧開市何繁華馬蹄牛角簇如麻大牛四五易一
馬紫騮青驄白鼻駒揚鞭作隊驅向磨天嶺盡歸長
安卿相家

茂山

茂山之西萬杉裏負鼎持斧者誰子云是六鎮人買

藥之三水虛項嶺外無人烟草行露宿五百里大木
橫臥不可越猛獸交蹄雜山魅何時復設厚州府剗
山伐木平如坻

烏曷巖

烏曷巖前瑟海口長鯨擊水背如阜髻鬣差峩噴白
雪島嶼蕩漾蛟龍走嗟乎爾形雖巨莫吞舟何所獨
無任公大釣手

胡山

胡山若是我地孔州定爲名區豆江清波泛彩舟奚
關綠柳繫玉壺手折五色蓮花腰佩八池明珠秋月

春風好時節走馬擊毬相歡娛安得如尹侍中金元
帥拓地千里遠至瑟海隅

北方蚊

北方蚊蚋大如蜂尖嘴吮血毒於鋒嗟我北人肌肉
薄爾獨何心來相虐搖吻鼓翼作雷聲使我不得安
眠食雖然不見衣冠族亦多浚民膏血者於汝微物
焉足責

莫食苗

雀兮莫食苗爾飽我當饑兒兮善逐雀日暮莫遽歸
然彼微物亦求食慎勿妄殺但驚飛

七月霜

七月霜已隕百穀秋無實嗟我民何辜遭此天降罰
登山拾榛橡能得幾日活坐待南粟航海來不知到
何月

耳麥粥

朝食耳麥粥暮食皮麩覈麥糜尙難繼安得豆與粟
無知小兒莫啼饑此物雖薄亦充腹卽今四野無青
草來月以後更無食

朔風

朔風日怒號問爾怒何事我本無心吹寧有怒與喜

在東句芒坼在南民愠解每到北方聲激烈吾亦不
知所以乃

曉起

曉起排戶視夜來雪數丈門逕高沒頂隣里塞來往
引索通汲路穴裏人相呼縱然得水來其奈薪米無

天鷄

天鷄一聲天下鷄鳴海色蒼蒼日出之光八表同明
自我東方我獨先覩地近扶桑

瑟海鳴

瑟海鳴聲訇轟千山振百獸驚問何鳴誰不平地軸

翻天醉醒三夜鳴四海清

秋夜長

秋夜一何長夜長晝隨短遠客無睡度夜難行人在
道愁日晚不獨宋玉悲秋氣不獨歐陽歎秋聲如何
長安行樂子秋夜猶短欲添更

雲蒼蒼

雲蒼蒼兮海茫茫望美人兮天一方秋風起兮露爲
霜燕北鄉兮鴈南翔天何高兮夜何長明月來兮照
空床心煩勞兮亂中腸夢隨君兮魂飛揚

牧羊客

借問金華牧羊客何事人間久遊遨得非誤讀黃庭
無乃暗偷碧桃答云北方多名山玉帝遣我採風謠

耳溪集卷二終

耳溪集卷三目

詩

初年拾遺

田家四時詞

流民怨

題蓮葉

促織

夜坐信筆留贈沈從兄天宥

靖之

雙樹亭

舟中望臯蘭寺

同抱川宰金汝源 孝大 兄弟遊懸燈寺

禾積淵龜巖

向亭淵

四宜堂與鄭幼能 克儉 金渾然 思渾 共賦

汶上途中

觀種麥

草坪

歸溪

風乎亭

憶弟寄沁中

題鄭叔 錫保 壁上國島圖

三邈寺觀落照 二首

自歸溪過沙潭

穿華陽洞宿松面村

望商山

礪山皇華亭

全州南樓北望

挾仙樓

楞伽寺酬老僧慧玄

太古亭

重登待仙樓憶舊遊

過朱溪遜棲亭留贈主人李生弘喆

以耽羅督運御史過扶安與主倅兄弟留話

登鐵甕城東臺

奉贐朝陽令金叔用謙投紱東歸

盤龜月夜

上書莊二首

東萊蓬萊館敬次壁上韻

龍灣錄

以銀臺除灣尹發行

入箕城

送徐副學君受命膺奉使之日本

到灣府

統軍亭

望華樓

統軍亭次板上韻

夜登統軍亭點燭一炷沿江諸戍舉火相應

上官越三日聞罷官報

離灣府二首

境內士民三處遮道設餞

登白馬山城望遼薊

交符發行宿龍川聽流堂

涓上贈大同丞任毅中

携亞使登浮碧樓舟下大同門渡江而東

大興寺敬次慕堂先祖軸中韻

善竹橋

湖西錄

洪州風謠詩十章

自三山倉乘舟沿流而下登永保亭

舟渡寒山寺

觀海

看月島

自月島曉發向安眠島

宿昇院村度松林

白沙峰

望大洋

鳳凰臺

鳳凰臺別李上舍民秀乘舟分路

自抽島渡海向牙之浦

蛙鳴

端午

巨艦

寄族侄大園

樂仁

之官丹陽

四達亭閒吟

魯恩書院

成先生遺墟

成摠管祠

李上舍遊龍鳳山投示松落菴詩和而寄之

雨後發向錦營暮投麻谷寺

山寺滯雨夜聞溪聲書八絕

少晴出山向錦江

雙樹亭

過寺谷訪金監役

砥行

歸路追寄

早晴出寺向維鳩驛

與二三十士友觀漁川上

川上之會俞上舍汝醇

漢謹

有約不至

恩臥樓漫吟

水檻看月

重到合湖舊庄

寄訊田咸平晉祥

閒居遣興

重登永保亭 二首

途中日暮

堤上

解嘲

合湖近益湮削動萬衆築以鑿之

見池中影戲題

李伯受 商建 以臨歸求菊有戲語故詩以答之

賞菊花山與李詹玉 瞻 登太古亭

九月既望將遊扶江歷憩龍淵

平濟塔

臯蘭寺汎舟

黃山八卦亭 三首

自黃山乘月挈舟抵鏡湖隨潮而返宿八卦亭

還渡馬江繫舟自溫臺登清風亭

過維鳩驛途中遇雨

還渡錦江

漫題寄示洛中諸友

詩解

近民堂閒咏

歲暮有懷 二首

至夜

大寒閉戶

大雪

對雪

除夜

仲春又赴錦營歸投麻谷

溫宮

暮春監稅西倉過九成洞道吟

雨中獨坐

解符發洪陽

去官道吟

上游錄

已丑春以 寧陵獻官赴驪州宿南漢

向驪府挈舟上神勒寺

東臺晚眺

驪江

清心樓 二首

自驪州轉向鎮川楸山行寒食節祀

西歸途中

荷潭

自佳興乘舟過原州法天村向興元倉

過康川下驪江

自牛灣向甓寺

清心樓

過二十灘下細巖盤渦

自梨湖向楊根郡

耳溪集卷三

詩

初年拾遺

田家四時詞

正月驚蟄二月清明日中于鳥夕維參星嗟我農夫
靈雨既零流膏起脉澮畎俱盈携爾婦子犁耦是并
俶徂南畝敏此春耕嗟我農夫布穀既鳴春日舒長
百卉敷榮不亟不遲維時之爭播爾嘉種黍稷稻秔

右春

驕陽烈烈朱明盛長熙熙隰原草木豐芳嗟我農夫

我稼孔臧我苗孔碩咨彼莠稂莠稂桀桀與苗爭強
弗勸弗柞我田其荒鼂升于隴婦隨以筐赭汗雨地
黃埃滿睚嗟我農夫既瘁以痒趨時疾力毋敢嬉康
天記爾勞錫以穰穰

右夏

歲云秋矣天氣肅殺含秀垂穎凋華就實嗟我農夫
我稼既熟禾麻菽麥稻梁黍稷穉穉穰穰掩疇蔽陌
揮爾長鎌磨爾短銓雲披霧合如屋如櫛嗟我農夫
我豐其食君子之賜匪私攸力何以報之壽考多福
何以祝之淑明其德

右秋

十月納禾歲徂其莫田家少事縣吏不怒嗟我農夫
竟歲良苦甕彼薶黍濁醪清醑往謀珍殺臠鷄膈殺
罍爾父兄薦爾妣祖招携雜選村叟野姥瓦缶土鼓
狂謳醉舞嗟我農夫樂思其瞿茨墻盖屋熏穴堽尸
晝山于採宵婦絲布節爾衣食來歲是顧

右冬

流民怨

孟冬霜雪繁我行湖之澹盡日來去人太半是流民
問爾何所苦漂轉至於斯棄捐丘墓鄉提携欲何之
舉首向我對蹙然為累吁我本內浦人三世為農夫
夫耕婦織布生理一何艱晝夜勤作息十指無暫閒
祁寒與暑雨靡日不苦辛重以水旱災所獲能幾許

稼成不入口火急供常賦縣吏日至門叫呶何太恣
奔走備酒食徵責殊未已乳下數歲兒又充閒丁籍
家中無所有厩上一黃犢將犢之東市輸官有餘逋
機中斷幾疋盡作京軍袍寧留尺寸布可以掩吾髀
無衣復無食何以卒此歲寒風凍裂肌兒啼不可聽
人生誰云樂不如棄野垆携妻復抱子東西與北南
所向無樂土旬日食纔三太守尙不知 君王豈盡
聞竊聞廊廟上僕妾厭稻紈朱門列鍾鼎歌吹日喧
喧昊天子萬物厚薄一何偏頰仰終漠漠疾痛向誰
懇聞語未及已惻然使我疚歸來食不甘若已有瘰

瘰作詩配風謠將以獻明主

題蓮葉

一片青山半畝廬西湖秋事近何如荷花自此少顏
色盡是騷人刻畫餘

促織

盡日林中響通宵枕底鳴不知織多少長作弄梭聲

夜坐信筆留贈沈從兄天宥

靖之

白城縣西里數畝茅茨屋門前五楊柳庭上雙白鶴
借問誰所居碩人之邁軸吾兄信奇士文章富繁縟
學問窮經史詞賦凌潘陸作詩尤宏肆大雅絕雕琢

造化入牢籠蟲魚愁剪斲然有餘韻瓊瑤鳴佩玉
大聲驚里耳不別徵與角空藏太古音未和南風曲
高價乏連城美璞猶韞櫝伊我性本拙况之寡所學
爾來晚好道發憤便忘食携家海之濱於焉遂屏跡
鄉曲難與語尋訪非所樂君居幸不遠往來纔一宿
有時跨驢至留連意甚適搜篋索新詩光恠爛盈矚
往往令人驚灑然開心日論君似韓子吾曹等籍湜
齷齪真可鄙猶許備酬酢駑駘逐良驥走僵不勝策
二月春物好山屏藹深閨日哦於其間有詩俄成軸
歌叫露天真談笑間諧謔方其得意時萬有輕一噓

離合本無常驩娛苦不足惆悵明朝別此遊那時續
秋風結幽期願言各努力

雙樹亭

雲壇獻馘豎龍旗弓劍難攀歲月移惟有錦江春色
在年年重上萬年枝

舟中望臯蘭寺

江雨霏霏滿客船扶蘇王氣冷如烟惆悵千年歌舞
地短燈疎磬一僧眠

同抱川宰金汝源

孝大

兄弟遊懸燈寺

漠漠秋空濶飛筇響石稜山深應有寺樹老靜如僧

霜葉鍾前落寒禽梵外興閒看繡佛影細照蓮花燈

禾積淵龜巖

煉丹石上雲寂寂洗鼎池中水泠泠洞門一閉仙人去唯有神龜護茯苓

向亭淵

星月蒼蒼欲曙時郵亭一宿又東馳峽江帶雨朝烟濕秋野連天匹馬遲佳景渾隨紅葉盡幽懷獨與白雲期東關百里亭淵路流水青山一半詩

四宜堂月夜會鄭幼能

克儉

金渾然

思渾

拈韻

共賦

并序

余遊永平歸五日幼能渾然乘夕聯裾而來各袖詩卷以示予仍索予東遊之作明燭圍坐高聲朗誦論評相可否予於幼能北征之作取樂民樓渾然四郡之詠取候仙閣蓋境最勝詩亦最佳也顧予所歷東不過嘉平北不過平康其所稱奇巒邃壑直是鐵嶺之枝葉二潭之餘波也宜其詩之寥寥不足稱也况才又下於境耶然吾三人之遊各擅一方之勝北以雄麗勝南以奇秀勝若夫礪谿邃曠之致則東亦有焉皆足以相長而不能兼焉及至一席相對歷歷指點咏其詩而得其趣聽其

言而會其境大而山川謠俗小而樓亭礪壑合三方之勝而森列於眼前便若携手拍肩聯翩於其間也則今日之遊於是乎最奇矣不可以無識遂探韻相屬詩未成而鷄已唱矣天明而散把盞爲別二客謂予曰凡鄉人飲酒主人先於客禮也以詩爲禮子其先乎予不得辭率意而成

幽居牢落獨離憂剝啄聲中摠舊遊十載塵埃俱老大一燈談笑自風流蟲知歲暮鳴寒壁月待詩成傍小樓陶令素貧還有酒恨君辜負菊花秋

汶上途中

春日遲遲草滿垌春風細細烟生汀單僮半臂齋詩卷瘦馬高稜着酒瓶花亞石縫紅掩碧雨深山燒黑翻青沙邊獨鳥當歸路睡罷斜陽坐曬翎

觀種麥

村女繇裳不掩足麥種和泥卷前幅郎負長鑿兒叱牛暖風遲日下山曲

草坪

李氏仙庄雲霧扃我行其野草青青山晴日射藏書閣客到花深放鶴亭柳岸垂絲釣江鱖藥欄流水煮山苓一區分華如相許我欲因之起小櫺

歸溪

萬畝中間一草堂行人立馬山蒼蒼烟霞暮映花千
樹鷄犬晴喧水一方春酒壓槽松筍熟山庖供客蕨
芽香此心便欲携家室身世如今渾兩忘

風乎亭

春日行行踏翠微輕風裊裊撲征衣溪邊立馬花如
雪橋上觀魚雨滿磯幽興杳然堪息跡此身閒處便
忘機傍人莫笑尋春客點也如今得意歸

憶弟寄沁中

深院無人獨倚欄有時惆悵即忘餐池塘一別春雲

隔江海相思夜月團谷鳥多情空自和庭花欲坼共
誰看沁陽春色何時好與汝同携積石山

題鄭叔

錫保

壁上國島圖

六鰲抃山山東蟠東海之東多神山秦皇漢武竟不
得芝草金光茁其間君不見金剛之北有國島列瑤
累玉入雲表豐隆運斤巨靈呼削出雲根成稜觚天
藏地秘海一隅不是蓬萊是方壺東來海客爲我語
壯哉仙區天下無風雷一夜擊海若掛在鄭氏高堂
之素壁驚濤急湍蛟龍怒烟靄明滅生咫尺峨峨疊
嶂白叅差渺若縣圃玉山立神功施巧不雕琢工倕

攬指班子泣大石偃蹇摩蒼空小石錯落列芙蓉日
月出沒青冥外鸞鶴往來靈窟中羽衣飄颻相對立
無乃王喬與赤松離披亂篁石間抽又似瀟湘來清
風乍驚沆漚衣上生忽疑空籟耳邊清丹青豈從神
化來人工敢與天機爭安得壯士擘斲爲棟樑撐持
大廈長不傾

三邈寺觀落照

二一首

斜陽惆悵獨登臺遙望西天白日頽莫恨清光留不
住明朝依舊上山來
纔上東來又西馳緣何不肯駐少時只是人間分晷

夜清暉萬古本無虧

自歸溪過沙潭

幽蹊無處不怡神况復搜深訪隱淪流水聲中四十
里綠蘿陰裏兩三人雲藏離嶽峰前寺花發清川雨
後春且喜明朝踰嶺去奚囊應有百篇新

穿華陽洞宿松面村

離嶽高高不可攀名區近在此中間初看翠壁千重
合遂有清溪九曲環僧與白雲歸暮寺馬穿紅葉出
深山村翁濁酒多真意野話慇懃半日閒

望商山

清秋九月鴈南歸霜菊初黃野稻肥何處田家釀白
酒有時山果落征衣商山錦樹天中出洛水晴雲馬
首飛此去郡城應不遠萬株槐柳隱朝暉

礪山皇華亭 甲戌

職是唐知舉官兼漢殿中

以湖南京試官例兼
臺卿故起句及之

星槎

入南斗飛鳥避青驄驛路天連海山河國異風九重
方急士何以答 宸衷

全州南樓北望

三冬久鎖承明廬千里仍乘使者車地近耽羅多駿
馬春還水國薦嘉魚山川太史神應助湖海元龍氣

不除惆悵拱辰樓上望日邊消息近何如

挾仙樓

小縣真靈窟高樓非世間人家皆綠竹官舍亦青山
赤壁今如昨蘇仙不可攀憑欄空悵望明月鶴飛還

楞伽寺酬老僧慧玄

海外千年寺雲間八影臺青山僧共靜明月鶴俱來
慧眼清如水塵心冷似灰相看無一語身世兩悠哉

太古亭

小構非人界清閒吏是仙水流無盡日松老不知年
酒有蓼苓氣竈殘黃白烟憑欄意超忽雲岫翠相聯

重登待仙樓憶舊遊

一別仙樓夢裏思重來此日未曾期
筍輿載酒花間出綺席橫琴柳外移
魚鳥似知前度客風流却憶少年時
峨洋舊契今安在侍妓新翻綠水詞

過朱溪遜樓亭留贈主人李生弘喆

雲樹深深掩洞門小橋芳草入仙源
南阡北陌開千戶流水青山共一村
隣社黍鷄隨父老他年花竹長兒孫
鹿車有約歸須早何必尚平畢嫁婚

丁丑冬以耽羅督運御史下湖南過扶安與主

倅鄭希天昌聖兄弟留話

京洛從遊十數年中間離合兩依然
君今佩綬扶風縣我亦含綸泛海船
千里萍逢真勝事三宵桑宿是前緣
明朝又向邊山去共掛蒼松雪裏鞭

登鐵甕城東臺戊寅莅江東時

大陸西馳薩水前層峰戍削斷還連
天中一柱平如掌清北諸山小似拳
野色蒼茫看未了風光浩蕩坐翛然
青雲洛水春應晚悵望關河隔暮烟

奉贖朝陽令金叔用謙登號投紱東歸朝陽三

奇氣青霞鬱未宣低徊郡紱志昂然
江山百里花爲縣琴鶴三年吏是仙
煉罷金丹將入道歌成松菊忽

歸田翩翩匹馬休官去瀟灑行裝拂一鞭

盤龜月夜

庚辰莅慶州時

盤溪一曲錦屏開太守行春五馬來雲捲石門流皓
月風生水檻聞空雷青娥袖拂巖花落玉笛聲飄舞
鶴迴星斗闌干人影散笙歌移上最高臺

上書莊

二絕○崔孤雲舊莊在半城南世傳上書麗祖處

金鰲山下舊莊留黃葉青松往事悠莫說孤雲鑑識
遠恨君猶未讀春秋
文章已著黃巢檄符命何煩王氏廷當日入山如不
早書莊應復比玄亭

東萊蓬萊館敬次壁上韻

先祖洪崖先生謫東萊縣令雪谷鄭公誦為
詩以贈膾炙一代後人刻揭蓬萊館吾洪氏
之宦遊此地者皆步其韻揭壁殆數十板小
子尹東京時族兄名漢氏為萊伯書邀甚勤
馳往為數日遊仍次雪谷韻揭于下

吾祖來何歲迢迢碧海端文章曾瑞世遷謫亦仙官
雪老詩長在雲孫慶未闌紗籠題滿壁慚愧續貂難

龍灣錄

癸未秋薦拜義州府尹

以銀臺除灣尹發行

朝退委蛇自講筵夕承恩誥鎮西邊才慚畢子論兵
地跡似相如諭蜀年長樂鍾聲清更遠關河月色缺
還圓夢魂不識山川隔夜夜趁陪尺五天

入箕城

雙旌駟馬出西關浪上重來五載間魚鳥解迎前度
客江山不改舊時顏向來勝蹟多薰歇此日行裝似
錦還一宿城樓明發去暮雲何處是龍灣

送徐副學君受

命膺

奉使之日本

文星夜犯牽牛界瀛洲學士將渡海朱衣象笏涉重
溟片帆高掛金鰲背高名會看振殊俗文章會已鳴

當世長風萬里一瞥舉天海之間坐指顧樓船上頭
望若仙意氣安閒揮塵語魚龍百恠不敢近弁服千
隊快先覩君不見麗代鄭文忠又不聞昔時黃秋浦
忠信可以服蠻荆氣節可以揚威靈今人古人不相
遠肯教二子專美名君行未及東泛海我車先已西
出塞臨分竟失送行翰在途聊復寄尺紙人言海上
多神山琪樹珠宮若可攀秦家天子發浩歎齊國談
士說荒誕人間豈有不死藥海外應到無底谷不必
求金光草不用載支機石扶桑有葉大於筐金蠶吐
絲隨風揚濯以沆漚水曬以紅日光天孫織之作衣

王漢集 卷三
裳一縷可延千歲長君乎何不得來獻吾 王繡出
山龍黼黻章衣被萬姓壽齊岡

到灣府

青冥鈇鉞下龍灣寶劔雕弓馬上擐高麗地窮衣帶
外單于臺接戶庭間春光不到長榆柵佳氣常浮駐
蹕山還愧疎才叨鎖鑰戟門多暇敢求閒

統軍亭

倚劔孤城一放吟邊風七月氣蕭森胡山轟轟黃雲
暗遼海荒荒白晝陰獵火時從何處起塞鴻遙入半
空沉鴨江日夜流千里國耻年年較淺深

望華樓

龍灣一路走燕京玉帛年年渡此行天地橫分三派
水山河割與九連城堪憐弱國無長策猶幸邊臣際
太平莫向望華樓上望皇華秋色異崇禎

統軍亭次板上韻

遼野平低案灣河急瀉瓶請纓無壯士鳴劔有孤亭
大漠秋雲白三江戍火青域中新禁酒天醉也應醒
七月望夜登統軍亭點燭一炷沿江諸戍皆舉
火相應

萬里江城接素秋疎星散落水雲浮中宵劔氣橫燕

塞薄暮歌聲滿戍樓元帥令傳千點火華夷界入一
方舟天時地利渾無賴勝算須占幄裏籌

上官越三日聞罷官報

罷官報至上官初千里戎垣一夢虛功名都付塞翁
馬風味聊嘗鴨水魚

離灣府 二首

西來缺月未重弦行色飄然拂一鞭十日龍灣何事
業統軍亭上筆如椽

感激 君恩到處優輕車踏盡鴨江頭應憐青瑣三
庚直故借銅章千里遊

境內士民三處遮道設餞

傾城髻白擁車前野款江魚錯餞筵一旬令尹行何
政多愧前賢選大錢

登白馬山城望遼薊

峒嶢古堞切蒼旻此日登臨感慨新安市城邊雲漠
漠遼陽江外草萋萋眼前寸地非吾土天下奇男有
幾人箕子舊封無處覓清笳一拍淚沾巾

交符發行宿龍川聽流堂

斜日投雙紱單車入小灣三刀真是夢一劍好歸山
細雨留征蓋蒼松對舊顏慙慙麾下士百里遠來攀

浪上贈大同丞任 毅中

白髮關西老督郵，清秋傾蓋浪江頭。我今跡似重來鶴，君亦身同不繫舟。滿席紅粧無舊面，高樓半夜拭青眸。燈前話到行藏理，笑指天邊一鴈浮。
任老新移都事仍留

掌試不得歸且解相命故第四第七云

携亞使登浮碧樓舟下大同門渡江而東

樓船晝泛大江流，秋水連天積翠浮。萬象涵虛光不定，游魚吹浪意相留。歌聲落水汀雲起，舞袖翻空夕靄收。日暮芳洲分袂去，烟波無限送人愁。

大興寺敬次慕堂先祖軸中韻

望裏烟霞一道開，諸天蘿月共徘徊。此中應有人間寶，僧抱驪珠滿軸來。

善竹橋

善竹橋邊夕照明，崧陽碑下斷雲橫。江流不洗忠臣血，山鳥皆含故國聲。

湖西錄 甲申秋除洪州牧使

洪州風謠詩 十章

甲申陽至之月 上御經筵講毛詩至七月
章感周人之重穡，憫諸路之荐飢。乃命八道兩都大小文吏各述其職方謠俗巷閭幽隱

以比古之陳詩觀風甚盛舉也臣于時待罪
於洪謹撰四言十章章各致意隨驛以進

灑灑王風自邇揚遠跨漢而南覃于外甸外甸維湖
雄都大陸左嶺右海澶漫包絡穰穰百年義摩仁响
農服世疇工執曾矩既豐而殷邦國之府玉粢冰包
春獻秋賦分壤列守錯落躔疆迺眇右服實為洪陽

右第一章敘風化漸被之盛

維洪之治維古大邑闢戶萬餘領縣二十建牧自麗
控截內浦水環其虛吳山齊島鳳首之岑金馬之川
蟠壇翁噓孕秀產賢虎臣如瑩烈夫如成風傳故胄

詩禮冠纓園沼卉竹西時東洛衣食之源厥土孔樂

右第二章敘山川民物之美

孔樂厥土物其阜矣其阜伊何維海之膩煑浪成齧
聚鏹如屋衡水算魚斟船為斛青鱗紫甲流離狼藉
筐女笱兒跳躍掇攫棄擲殘腥烏鳶飽嚇敗爛蹙踐
糞彼沮野輕車重馬肥我東韓爰有大浸以開良田

右第三章言濱海魚鹽之饒

大浸瀾瀾曰維合湖三郡仰漑其田萬夫春日鳴鳩
繡井昫昫千耦齊作舉罇如雲秋而有稼萬寶登盈
捭鼓祭社樂此豐成春之雪白供我尚食貢舶闐港

櫓帆相擊士女嬉遊于陌于謳何以謳之太平之休

右第四章言大隄灌溉之利

自乙徂壬歲屢不贏山枯澤損泥淤隄平洫之不力
原失其膾昔畝而鍾今不盈釜大沴流行水陸俱侵
魚不就網鹽貴如金斥船破盆人散稅詘農賈遷析
井落凋豁十載之間豐瘠異觀腴戶亦瘁矧彼羸民

右第五章言近歲災傷之慘

惟此羸民孔窶且悲借田傭食富歲恒飢環視其家
瓦鼎繩戶倒困充糶賣襦輸布婦啼于機裳不掩脛
里胥叫門鷄狗不靖或繫之獄族征隣逋忍別骨肉

寧顧田圃號呼躑躅視日瞿瞿弗振弗綏殆其中溝

右第六章言小民困苦之狀

聖后卹然玉食靡安捐貢減租濯痍煦寒大發北粟
浮海千艫分遣邇臣以來以哺噓為惠風融為膏雨
赤子偃僂如就慈乳謂瘠于野今飽而歌迺父迺子
迺室迺家粒我絲我維 君之渥 君兮萬壽每飯
必祝

右第七章陳壬午賑救之惠

噫嘻今歲天篤降飢既曠而水又風雹之附海之壤
茫然如滌何食以稅民用大惕有降自天德音來矢

寬徭免逋一如前歲父老相告何施之博安爾宅里
謹爾租糴毋恐以寧來春是後有怙在上今其活汝

右第八章陳今年飢荒之實

氓之蚩蚩亦孔之神慢之則夷柔之則人朝為善良
夕化姦頑匪性則然惟率之遷治束於文免而罔格
或褻于惠澤用斯涸弗刻弗縱民乃自得民之得矣
又從直之我長我上其心如結凡百民牧敬哉毋失

右第九章論結民心之要道

於穆 聖后臨旨八宇不倦于勤奮發咨究詩傲七
月燮清六晝命述幽隱比古省方惟此湖堧國之外

藏屢病于荒民氣不揚恩言始播呻喟皆騰守臣匪
良恐懼莫承非仁曷燾非損曷益保我黎萌基千萬
曆

右第十章述採民隱之德意

自三山倉乘舟沿流而下登永保亭

層城畫閣立崔嵬逐水危欄面面開繞座魚龍成窟
宅隔簾雲霧化樓臺蓬壺莫是人間有笙鶴應從月
下來千載謫仙呼不得春風搔首一徘徊

舟渡寒山寺

繫纜長洲草似茵清歌嫋嫋送行塵江花解笑能留

客沙鳥忘機不避人

觀海

勺水多如許青天包有餘山河浮積氣日月走歸墟
萬族藏猶少百川吞若虛登臨意不盡寥濶竟何如

看月島

何處飛來石一拳滄波之上立岌然羣峰錯落如碁
布積水空明似鏡懸古寺無僧深鎖佛扁舟有路可
尋仙登臨最好中宵望月色天光狀萬千

自月島曉發向安眠島

一宿諸天夢亦奇輕舟欲發舉帆遲疎星耿耿隨潮

落殘月依依並棹移此去方壺無咫尺回看滄海有
盈虧漁人指點三峰近極目烟霞處處疑

宿昇院村度松林

山鳥嚶嚶伐木時小輿便服出林遲閒情自在騎牛
客幽興相將吹笛兒細草香生流水遠夕陽影碎亂
藤垂此中安得龍眠筆摸取吾行一幅奇

白沙峰

忽驚銀漢近遂有雪山尖不夜長留月因風細散鹽
望中同皜皜坐處覺纖纖玉砌元非琢銀泥却不黏
何煩雲母榻宜着水晶簾曳履常嫌汚班荆不怕霑

青天多灑氣朱夏失蒸炎露淨傾珠淚霞輕拖素練
鷗飛渾滅影鳥止倍憎黔並坐疑相失凄清未可淹

望大洋

積水蒼茫四望通青烟九點氣濛濛天旋日月麗黃
道雲散蛟龍戲碧空齊楚遙分千頃外蓬瀛只在一
帆中扁舟欲渡無風便獨上孤峰思不窮

鳳凰臺

海上羣仙此地遊仙人一去臺空留滄波日暖魚龍
變西極天傾島嶼浮鰲負三山猶不定鵬飛六月且
應休孤雲漠漠歸何處雙袂飄飄不自由

鳳凰臺別李上舍

民秀

乘舟分路逢大霧相失

與子同舟月島下今朝分袂鳳臺西飄然一葉潮俱
往宛在中流霧共迷仙舉只應留紫氣鴻飛何處覓
霜泥萍逢海上仍星散悄倚蓬窓暮色凄

自抽島渡海向牙之浦

放舟凌碧海移棹出晴烟泛泛羣山小搖搖萬象懸
枕邊惟白水帆外盡青天始識寰區大方知造化全
浮生輕似蟻塵慮蛻同蟬鷗鷺飛還沒雲霓斷復連
窅然吾喪我忽爾後瞻前天下難為水人間或有仙
形神俱漠漠衣袖自翩翩何處來笙鶴洪厓共拍肩

蛙鳴

蛙鳴有底急羣叫若相期得得天新雨轟轟雷出池
可能當鼓吹那問為公私縱破閒中夢還饒枕上詩

端午

此地逢端午去年趨玉墀天香餘舊扇佳氣入新詞
短髮江湖遠丹心日月遲薰風生屋角猶似退朝時

巨艦

天險莫如水人功濟不通寓形從異上容物在虛中
萬斛鯨吞水層濤鵬擊空遇潮方得意衝瀨乃知功
繫處安如嶽行時快若風魚搖尾撥刺龜露背穹窿

淺壑那能負重溟亦可窮乘飈無近遠逐日辨西東
運用叅神造行藏任施工百年滄海靜相伴一漁翁

寄族姪大囿樂仁之官丹陽

聞說洪厓子新辭白玉樓神仙猶墨綬官舍是丹丘
雲迥三巖月江清二島秋扁舟渺然去琴鶴在中流

四達亭閒吟

滿庭濃是柳遶檻碧為潭聽訟游魚出開衙遠岫叅
詩成聊獨臥客至漫清談官舍無塵事還疑老釋菴

魯恩書院

六士同時死 英陵始有臣但成一箇是寧願百年

身曆數歸 真主綱常立後人千秋魯恩洞棟宇自
嶙峋

成先生遺墟

借問成承旨能懷生長村山河猶烈氣星月見忠魂
豈是迷天命徒知答 主恩男兒誰不死名字滿乾
坤

成摠管祠

忠臣有是父烈士喪其元魂托南方些名爭北斗尊
丹心終不死白刃竟無言髣髴神靈雨時時灑古原
李上舍遊龍鳳山投示松落菴詩和而寄之

客去蟬聲裏雲歸鳳岫深清香猶在榻流水不鳴琴
僧與詩俱至情將海共斟為言松落好呼我小輿尋

雨後發向錦營暮投麻谷寺

積雨驅車出山雲散復濃江河餘怒氣草木有哀容
馬足穿仍血石稜尖似鋒隔溪尋古寺流水不聞鐘
山寺滯雨夜聞溪聲書八絕

山溜細如線尚懷朝海心不使須臾息終成萬丈深
百川爭入海辛苦向東馳畢竟皆能到何論疾與遲
人生本不齊川瀆江河似且看東歸時渾然惟一水
濁能潤畎晦清乃別妍媸但使足無濯莫教魚不孳

聖人稱是德智者樂其形觀瀾雖異術流水本無情
遇險仍成瀑洄深却化潭性非隨物變功蓋與神叅
雲來水有影雲去色還空只是雲來去都無物在中
風定方能照波行始有聲無聲亦無照冲漠更難名

少晴出山向錦江

洞門流水急野店行人稀林靄晴猶滴江雲濕不飛
蒼茫迷遠岸明滅見斜暉峽浪連天白漁舟不辨磯
雙樹亭

先王昔南狩遺澤最茲方不有戎衣日那瞻寶辰光
錦江成渭水雙樹勝甘棠玉輦經行處于今草木香

過寺谷訪金監役 砥行 歸路追寄

立馬秋山裏蟬聲在草堂滿庭都是翠入室自生香
揮塵知形穢呼茶覺味長詩書多事業他日卜行藏
早晴出寺向維鳩驛

留詩僧與別高興滿秋旻漸聽鍾聲遠回看嶽色新
白雲猶在寺流水却隨人山外皆塵界歸來不染身
與二三士友觀漁川上

暇日肩輿出清秋勝事稠解衣還藉草裹飯更臨流
魚豈知吾樂翁能與客遊莫隨人影散且爲水聲留
川上之會俞上舍汝醇 漢謹 有約不至

小盖臨平楚便衣坐翠微水流魚不動雲去鷺還飛
物色今如此良朋且莫違隔溪空悵望秋思正依依

恩臥樓漫吟

伏枕江湖晚閒居水竹宜雲移山影動天迥鳥飛遲
病骨秋仍健詩情老更奇不知身作吏莫問我爲誰

水檻看月

萬物自生照長河靜不波池塘如月好魚鳥得天多
幽興轉無賴浩歌將奈何忽看水底影還對百東坡

重到合湖舊庄

耕讀三年地悲歡廿載身重來今墨綬往事憶青春

鷗鷺皆生面湖山是故人村童如我老相對鬢成銀

寄訊田咸平晉祥

故人隔雲水眠食近何如縱有兼旬雨那無一字書
已嘗新稌飯能飽小川魚不見清詩久秋風正起予

閒居遣興

琴書爲政事湖海寓文章野曠知天大心閒覺日長
蟲魚皆造化雲鳥是行藏人或疑陶令吾非學楚狂

重登永保亭 二首

鰲背秋風起飄飄動客衣捲簾紅日近高枕白鷗飛
積水渺無際孤帆何處歸蓬瀛如可見島嶼晚依微

樓似波心湧山從水面圍蛟龍深不動天地自相依
畫角元戎臥烟濤戍火稀清秋有歸客終日坐漁磯

途中日暮

秋光無遠近行色晚繽紛野氣常如霧山嵐忽化雲
蟲鳴皆得意鴈去各成羣隔岸村烟起方知日已曛

堤上

大堤秋水長移席近中央鴈影分天色蟬聲散晚涼
池荷初結子野稻自生香少小曾遊處徘徊不可忘

解嘲

棲棲走郡紱矻矻窺塵編天下無窮事人間未了緣

秋風生短髮江海送流年聖世猶親見空言不必傳

合湖近益湮削動萬衆築以鑿之

萬鋪同時作長堤十里連呼邪聲沸海吹息氣薰天
鴈鶩爭餘飯魚龍返舊淵人功侔鬼運斥鹵化良田

見池中影戲題

水底人如我我行人亦隨明知非一物何事不相離
方寸終難狀妍媸任自爲此身元是幻真假竟伊誰

重陽前日求菊於李上舍伯受

商建

以臨歸栽

花有戲語故詩以答之

秋來不見菊遣使乞城東且欲歸三逕猶勤種數叢

孤芳宜歲暮隱德在花中縱付它人賞何妨與衆同

賞菊花山與李詹玉璿登太古亭

喬木園亭好黃花礪戶新仍逢名下士相對景中人
散袞圍紅葉烹茶近綠筠清談山日暮秋色滿歸輪
九月旣望將遊扶江歷憩龍淵

昔聞雙溪名今留五馬行石樓虛出籟霜葉落無聲
客到黃花暮鳥啼脩竹清躋攀忘日夕步履覺身輕
平濟塔

古塔崢嶸立路傍東征歲月記皇唐當時十士猶能
國何事孱孫竟不王巖老落花秋草合城空半月水

雲涼離宮別館今何處無數寒鴉下夕陽

臯蘭寺汎舟

繫纜江臯晚天寒古國秋僧歸紅葉寺鷗下落花洲
戰伐山河古興亡水月浮漁歌薄暮起橫笛在中流

黃山八卦亭三首

黃山亭下大江開江勢盤旋巴字迴壁上不須留八
畫眼前元已備三才
黃河消息幾時來東海蒼茫萬事哀讀罷春秋還讀
易暮年猶待一陽回

夙慕黃山勝登臨意渺然孤烟生極浦落木下秋天

耳溪集 卷三
地坼三江入亭高萬象懸蒼巖餘氣像壁立古祠前
自黃山乘月拏舟抵鏡湖隨潮而返宿八卦亭
汎月秋江曲亭臯落木時天隨洲勢轉星在水中移
潮退鷗相失船回人不知登樓興未已夢裏却成詩

還渡馬江繫舟自溫臺登清風亭

落日下汀洲孤帆立渡頭樓臨秋色遠葉盡大江流
風雨何時定君王不復遊長歌倚斷磴烟水自生愁
過維鳩驛途中遇雨

日出山猶暗天寒谷自風行人秋色裏落木雨聲中
節物紛紛變天機處處同詩情老未化支策看歸鴻

渡錦江

江陰如欲雨汀草自生烟風捲何山葉人歸內浦船
夕陽隨帆隱秋色與天圓不見關情處回頭却悵然

漫題寄示洛中諸友

經年爲政民無事暇日吟詩興轉幽鴈鴛不須求署
尾江湖聊且作遨頭池邊綠竹頻移席簾外青山自
滿樓寄語洛中簪纓侶五更鐘漏幾時休

詩解

萬竅各生吹人聲最得奇樂從處處出鳴豈不平爲
肉裏藏天籟毫端見化兒風騷千古響寥濶問憑誰

近民堂閒咏

邑里稻千畊官居竹數叢山低先見日海近早知風
印綬黃花外鈴聲細雨中頽然坐嘯者太守自稱翁

歲暮有懷 二首

獨坐烏歸夕微吟雪下庭鼻生虛室白眉帶故山青
澹泊知吾道逍遙見性靈丹砂猶未就鬢髮已星星
何處城南宅夢中青數峰蒼松如我老黃菊爲誰容
薄宦長爲客他鄉再見冬孤吟坐中夜相和有寒蛩

至夜

天機滾滾如毬轉世事悠悠似羽輕歲暮悲歌雙鬢

改江臯臥病一陽生寒梅欲綻香先動微月將升影
已橫寂歷虛窓閒點易燈花不斷篆烟清

大寒閉戶

閉門積陰裏冰雪滿山川天地心難見江河腹已堅
重裘猶擁火葷屋不生烟坐念無衣者何由挾纊然

大雪

花落從何樹沙明不動瀾山河渾一色天地浩無端
恠底烏頭白偏憐鶴頂丹物情忌太潔休向月中看

對雪

對雪千峰裏翛然浩氣生可憐心共白何事髮俱明

王漢集 卷三
曉透梅香冷宵添桂影清一塵都不染昭質有誰爭
除夜

老與春俱至年隨鬢共新悲歡前世事衰盛自家身
白髮無公道青山多故人悠悠千古志寥落與誰隣
仲春又赴錦營歸投麻谷

三渡熊津水重看鴈北回江聲山外盡春色雨中來
行邁靡靡遠流光冉冉催暮投山寺去身世却悠哉
溫宮

行殿春風起靈泉瑞氣長水中藏火德井底濕天香
湯沐承 三聖恩波洽一方邦人休望幸無疾祝吾

王

暮春監稅西倉過九成洞道吟

太守春行縣山中駐小車草生寒燒裏花發斧斤餘
陽氣誰能遏天心澗不疎蟄虫皆已振鰥寡問何如
雨中獨坐

吏告無公事蕭然隱几清嶺雲來暮色簷雨作春聲
鳴鳥爲何語吾詩亦漫成天機非得已無處不生生
解符發洪陽

三載西湖長飄然匹馬行出門無愧色臨水有離情
載鶴船還重焚魚袖自輕故園花欲盡猶可及流鶯

去官道吟

君恩湖海吏兼仙二十一回看月圓歸裝鶴背詩千
首爭似楊州十萬錢

上游錄

已丑春以 寧陵獻官赴驪州宿南漢

慷慨登城髮欲衝居人猶說丙丁冬山谿莫賴千重
嶮時運無如百六逢燕獄但聞三士死秦關未見一
丸封終知人事還天數痛哭單于立馬峰

向驪府挈舟上神勒寺

神勒何年寺巋然雲水間鐘聲飄遠郭塔影倒深灣

鷺浴滄波穩僧眠白日閒中流無限意停棹不知還

東臺晚眺

曳纜遵芳渚維舟上古臺江村皆北向春水自東來
石破驪圖出山連斗尾開曾襟聊一濯隨意倒深杯

驪江

大江東出峽千里不曾休屈折經層瀨平鋪放穩流
風帆連海遠烟水與天浮遂有黃驪勝高樓據上游

清心樓二首

空明一色淨無氛縹緲朱欄倒縠紋峽坼長江連漢
水天低遙野抱龍門微風古寺來疎磬斜日喬山有

斷雲最是夜深清絕處櫓聲伊軋夢中間

臨江高閣坐如天一嘯長風意欲仙四郡雲山春水

外 二陵松栢夕陽邊孤懷渺渺看歸鴈暝色依依

逐去船夜月子規啼不盡楚歌何處喚三淵淵翁板上詩二

陵春入子規啼之句至今膾炙故未句云

自驪州轉向鎮川楸山行寒食節記

客裏逢寒食山中見早花異鄉空對酒佳節倍思家

野水春風遠村烟落日斜丘原多灑飯林薄噪歸鴉

西歸途中

春光無遠近山色異西東細草濃新雨輕烟裊好風

鷺分遙港白花亞一川紅馬上成微醉禽聲似夢中

荷潭世傳于勒仙人第四休地

昔聞于勒仙芝盖下飄然徙倚琴臺上婆娑月瀨前

四休曾此地一去是何年雲水空千古長歌意渺緜

自佳興乘舟過原州法天村向興元倉

放棹乘春漲江聲漸覺喧天晴雲出峽岸逆水爭門

花暖蛟龍窟烟生漁釣村風光如畫裏佳麗最興元

過康川下驪江

上游一都會千室兩江間大壑涵元氣中流有斷山

晴霞浮鶴岫奇石抱牛灣便欲携家入春風掛帆還

王洋集 卷三
自牛灣向甓寺

江到黃驪大天連白水平
馬巖春草色神勒暮鐘聲
繫纜僧相問鳴榔魚不驚
東臺一把酒滿眼百花明

清心樓

芳洲春可憐楊柳水娟娟
薨接臨江宅檣連上瀨船
孤山晴泛浪平楚暖生烟
欲比鑑湖勝高歌白紵篇

過二十灘下細巖盤渦

甘灘纔穩下盤口又當前
亂石多牙角驚湍起沫涎
卷篷窺暗嶼收纜避來船
越險如飛箭回頭更愕然

自梨湖向楊根郡

清心樓下放船行春水連天鏡
面平霧捲長堤芳草滿日斜
遙浦暝烟生沙禽無數皆成隊
估客相逢各識名三宿蓬窓還舉
矴此身泛泛白鷗輕

